



Headline: Pegawai kastam mangsa Macau Scam
Publication/Portal: Berita Harian
Date: 21 March 2020

Language: Malay
Section: Wilayah
Page: 27

Pegawai kastam mangsa Macau Scam

Balik Pulau: Seorang pegawai kastam rugi RM30,000 dipercayai terpedaya dengan sindiket penipuan 'Macau Scam'.

Ketua Polis Daerah Barat Daya, Superintendan A A Anbalagan, berkata wanita berusia 45 tahun itu mendakwa menerima panggilan daripada suspek yang juga seorang wanita ketika bertugas, kelmarin.

Katanya, suspek mendakwa membuat semakan dan siasatan menerusi sektor awam di Putrajaya dan dikatakan mangsa pernah terbabit dalam kes jenayah membabitkan Suruhanjaya Pencegahan Rasuah Malaysia (SPRM).

"Suspek mendakwa mangsa terbabit dengan kes pengubahan wang haram sebanyak RM210,000 sebelum diminta memberikan kerjasama bagi meneruskan siasatan.

"Pengadu turut memberi semua kata laluan akaun bank miliknya selepas diminta suspek," katanya di sini, semalam.

Beliau berkata, pengadu kemudian menerima mesej daripada pihak bank mengenai pemindahan wang sebanyak RM30,000 daripada akaun miliknya.

Wang berkenaan dipindahkan ke sebuah akaun lain milik seorang lelaki dan ketika itu barulah mangsa menyedari sudah teripu sebelum membuat laporan polis.

"Mangsa mengakui berada dalam keadaan kelam-kabut ketika memberi butiran kepada suspek sehingga tidak menyedari kesilapannya sehinggalah wanita itu menerima mesej daripada pihak bank.

"Kes disiasat mengikut Seksyen 420 Kanun Keseksaan," katanya.